

**Projek hampir setengah bilion ringgit faktor kemenangan BN, kata Muhyiddin
Malaysian Insider
July 24 , 2013
OLEH MOHD FARHAN DARWIS**

Kemenangan dan peningkatan majoriti Barisan Nasional (BN) meningkat kepada 2,952 dalam Pilihan Raya Kecil (PRK) Kuala Besut disebabkan keyakinan pengundi bahawa parti pemerintah itu mampu untuk melaksanakan 15 projek yang diumumkan ketika berkempen di kawasan berkenaan, kata Timbalan Perdana Menteri, Tan Sri Muhyiddin Yassin.

Muhyiddin yang juga Ketua Pengarah PRK Kuala Besut BN berkata, projek bernilai hampir setengah bilion yang diumumkan kerajaan BN di kawasan berkenaan sekian lama dinantikan pengundi yang majoritinya adalah nelayan dan mereka yang terbabit dalam industri pelancongan.

"Projek itu dinantikan penduduk Kuala Besut. Ia bukan timbul pada saat-saat akhir, penyokong kita daripada nelayan, mereka membawa bot, bawa pelancong.

"Ia usaha yang baik, dan memberi kesan positif kepada kita," katanya pada sidang media selepas kemenangan BN diumumkan di Dewan Majlis Daerah Besut malam ini.

BN memenangi kerusi Dewan Undangan Negeri (DUN) Kuala Besut dengan majoriti 2,592 undi, peningkatan daripada 2,434 undi pada Pilihan Raya Umum 2013 (PRU13).

Antara projek terbesar yang diumumkan Muhyiddin ketika membantu kempen calon BN, Tengku Zaihan Che Ku Abd Rahman, 37, di kawasan majoriti nelayan itu adalah pembinaan benteng penahan ombak yang bernilai RM250 juta.

Menjelaskan berhubung pelaksanaan projek berkenaan, Muhyiddin menjangka projek itu akan siap dalam tempoh dua tahun, dengan langkah pertama ialah melantik konsultan, yang menelan kos RM500,000.

"Projek akan dilaksanakan dalam jangka masa sesuai, yang penting rakyat hendak lihat janji atau memang mahu buat. Lihat muka saya, saya akan buat," katanya ketika ditanya pemberita.

"Kita sasar majoriti lebih tinggi, tapi yang pentingnya (majoriti) bukan merosot, Pakatan Rakyat (PR) akan gunakan alasan undi merosot, sokongan merosot, tetapi sebaliknya, saya rasa ini sesuatu yang istimewa," katanya.

Ahli Parlimen Pagoh itu juga yakin kemenangan BN di kerusi DUN Kuala Besut adalah hadiah istimewa buat Perdana Menteri, Datuk Seri Najib Razak yang menyambut ulang tahun kelahirannya semalam.

BN memperolehi 8,288 undi manakala PAS pula sekadar memperolehi 5,696 undi, manakala sejumlah 125 undi pula diumumkan undi rosak.

Perkara itu diumumkan Suruhanjaya Pilihan Raya (SPR) di Pusat Penjumlahan Undi di Dewan Majlis Daerah Besut berhampiran Gong Kemuntong malam tadi.

Tengku Zaihan dilihat turut hadir di dewan berkenaan tepat jam 10 malam bersama Pengarah PRK Kuala Besut BN, Tan Sri Muhyiddin Yassin; Menteri Besar, Datuk Seri Ahmad

Said; dan juga Ahli Parlimen Besut, merangkap Menteri Pendidikan II Datuk Seri, Idris Jusoh, beserta anggota Kabinet bagi mendengar keputusan diumumkan.

Che Long bagaimanapun tidak kelihatan ketika pengumuman keputusan berkenaan dibuat.

Lapan Bahagian Pilihan Raya ditetapkan SPR di lokasi pertama PRK selepas PRU13 itu, dengan antaranya ialah Pulau Perhentian, Seberang Barat, Kampung Nail, Seberang Barat Luar, Tok Saboh, Kampung Nagka, Kampung Baru, dan Bukit Puteri.

Sebanyak 1,134 pengundi daripada kalangan tentera dan 14 anggota polis mengundi awal pada 20 Julai lepas di Pangkalan Tentera Udara Gong Kedak.

Seramai 14,108 pengundi membuang undi dengan jumlah keseluruhan pengundi hadir kali ini adalah sebanyak 80 peratus. – 24 Julai, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/projek-hampir-setengah-bilion-ringgit-faktor-kemenangan-bn-kata-muhyiddin>